

إسماعيل الشافعي «بطل العالم في التنس»

(في مكتب رئيس مجلس الإدارة)

عدلي: ايوه يا فندم تحت أمرك

رئيس مجلس الإدارة: أستاذ عدلي.. حضرتك راجل ليك وزنك هنا في الشركة واكيد لما اتكلم مع مدير عام الإدارة غير ما اتكلم مع موظف عادي

عدلي: أرجوك يا محمود بيه تكلمني بطريقة مباشرة

محمود: الحقيقة أنا عايز أكلمك بخصوص ابنك إسماعيل

عدلي: «بدهشة» عمل حاجة؟

عدلي: لا أبدا .. إسماعيل انسان ممتاز وبطل رياضي معروف بس كل اللي أنا عايز اقله ان البطولة شيء والشغل شيء تاني

عدلي: بس أنا محاولتش اعامل إسماعيل ابني معاملة خاصة أو استغل منصبه كمدير عام

محمود: وانا مقلتش كده

عدلي: امال حضرتك باعتلي ليه

محمود: عشان أقولك إذا إسماعيل حب يتفرغ للتنس .. يتفرغ .. أما إذا قرر يفضي لشغله أهلا وسهلا

عدلي: سيادتك كده عايز تفصل بين إسماعيل الشافعي البطل المعروف وإسماعيل

الشافعي الموظف هنا في العلاقات العامة

محمود: وايه المانع

عدلي: صعب جدا اني اعمل كده

محمود: ارجوك يا كابتن عدلي.. تقدر موقفي كرئيس مجلس إدارة مسئول عن كل كبيرة وصغيرة في الشركة

عدلي: «بثقة» تقدر حضرتك تتصرف زي ما انت عايز ..

محمود: أرجو انك تكون مقتنع بالكلام اللى انت بتقوله .. إسماعيل مش مستقر في مصر .. كل يوم بيطير في مكان .. وأنا بصراحة باعذره ونفسي يتفرغ للتنس عشان شهرته تزيد واسمه يكبر

عدلي: ونسيت حضرتك حاجة مهمة جداً ان إسماعيل الشافعي يلعب باسم مصر كلها مش باسمه لوحده

محمود: «بيرود» ربنا يوفقه .. بس الشغل شغل

عدلي: اللى تشوفه سيادتك بس ارجو ان حضرتك تتفاهم مع إسماعيل مباشرة لأنه صاحب الشأن في المشكلة دي ومن حقه يقرر اللى يعجبه

محمود: أنا احبيك يا أستاذ عدلي على طريقتك في تربية ابنك

عدلي: متشكر .. عن اذنك

محمود: اتفضل «خطوات»

«موسيقى»

«أثناء الطعام»

عدلي: ايه يا سمعه مش بتاكل ليه ؟

إسماعيل: أبدا يا بابا أنا باكل أهه الحقيقة يا بابا / أنا متعود ابص لقدام

عدلي: هايل يا أبو السباع «ضاحكا» بس أنا متعود بقى يا بطل مع كل سفرية

تسافرها أو بطوله جديدة تدخلها اسرح بخيالي مع أيام زمان

إسماعيل: يا بابا مخلص كبيرنا على الحاجات دي بقى

عدلي: عمر الأب ما بيعس ان ابنه كبير .. دايمًا يشوفه الطفل الصغير « فترة » فاكر

يا اسماعين كنت بتعمل ايه وانت صغير

إسماعيل: فاكر يا بابا

«إسماعيل وهو طفل في العاشرة من عمره يلعب بمضرب التنس نسمع صوتا من

اصطدام المضرب ببعض أثاث المنزل»

عدلي: إسماعيل بتعمل ايه يا حبيبي

إسماعيل «طفلا» بالعب زي بابا عدلي

عدلي: واللي يلعب تنس برضه .. يمسه المضرب كده ويخبط بيه الحاجات

إسماعيل: ما أنا عايز العب يا بابا

عدلي: انت بتحب التنس

إسماعيل: وعايز ابقى لعب كبير زيك يا بابا .. أنا شفت الناس كتير من النادي

بتسقف لك

عدلي: وانت كنت بتسقف

إسماعيل: انا كنت باكل سندوتش وبعدين كنت هاسقف

عدلي: خلاص يا سيدي .. من الصبح هاخذك معايا النادي عشان تلعب تنس

إسماعيل: طيب عن اذنك يا بابا عشان اعمل الواجب بتاع المدرسة وأنام عشان
اروح النادي من الصبح

عدلي: تصبح على خير يا حبيبي

إسماعيل: تصبح على خير يا بابا «يقبله»

«ضحكاتها وهم كبار»

عدلي: شفت بقى كلامي يا أبو السباع .. طلع مطبوط ازاي

إسماعيل شابا: آه طبعاً البركة في نصايحك يا بابا / .. مش يقولوا ابن الوز عوام /

عدلي: وانت ما شاء الله عوام صحيح .. «ضحكات»

إسماعيل: انا قلبي حاسس يا بابا إني هاعمل حاجة في بطولة ويملبدون /

عدلي: قول إن شاء الله

إسماعيل: بإذن الله

عدلي: المهم تدوس على نفسك شويه في التمرين وتخلي اعصابك هادية دائماً

إسماعيل: الحقيقة يا بابا احتكاكي باللعبين المحترفين علمني حاجات كتير

عدلي: عشان كده الناس استغربوا لما سألوني ايه شعورك لما إسماعيل ابنك كسب

بطولة العالم للناشئين سنة ٦٤ وساعتها قلت لهم .. فرحان طبعاً بس لسه

مستنى فرحة أكبر من كده ولما سألوني ايه هيه الفرحة الكبيرة قلت لهم

هتعرفوا بعدين «ضحكات»

إسماعيل: وكنت تقصد ايه يا بابا ؟

عدلي: كنت أقصد الانتصارات اللى بتحققها واللى حققتها بعد كده واللى بتحققها

إن شاء الله

إسماعيل: أقوم انا بقی عشان أحضّر نفسي للتمرین

عدلي: خللی بالك لندن الیومین دول برد جدا .. عشان كده لازم تفتكر تاخذ معاك هدوم ثقيلة

إسماعیل: حاضر يا بابا «فترة صمت»

«صوت الطائرة في الجو ثم أثناء هبوطها»

محمد مجاهد: «في المطار» حمد لله على السلامة يا كابتن إسماعیل

إسماعیل: الله یسلمك

محمد: أنا محمد مجاهد رئیس اتحاد الطلاب المصريين في انجلترا

إسماعیل: أهلا يا أبو حمید

محمد: احنا في الحقيقة يا كابتن مجهزين لك حملة كبيره عشان تشجعك وتكون معاك دائما .. عشان تحقق لنا انتصار كبير

إسماعیل: متشكر جدا على الشعور العظيم ده

محمد: دا واجب علينا يا كابتن دول عاملین حسابك قوي هنا ... یقول

عليك الحصان أسود بتاع البطولة

إسماعیل: يا سيدي لا أسود ولا أحمر .. بس الواحد يعمل اللى عليه والباقي على ربنا

محمد: ودلوقت نسيك يا كابتن عشان تروح الأوتيل تستريح وبعد الظهر هتلاقينا

حوالك في التمرین

إسماعیل: بإذن الله ... «صوت سيارة»

روبرت: «هامسا» ماكس أنا عايزك تتابع إسماعیل الشافعي زي ضله .. أكيد فيه

متعهدين غيرنا عايزين يمضوا معاه عقود احتراف

ماكس: ما تخافش يا روبرت .. أنا صاحي جدا

روبرت: الولد ده إذا كسب الماتش الجاي في درو الثمانية هيبقى أول بطل عربي يحقق ده .. ومعنى كده ان تمنه يرتفع والعروض تنزل عليه أكثر وأكثر

ماكس: فاهم ... فاهم

روبرت: ودلوقت اسبيك عشان عندي شوية شغل

ماكس: اتفضل واطمنن جدا

روبرت: انا هابتدي اجهز العقد بتاعه

ماكس: أو كيه « خطوات ثم فترة صمت قصيرة »

« تصفيق حاد لفترة » « أصوات متداخلة »

محمد: اهو كده يا أبو السباع رفعت راسنا وشرفتنا

إسماعيل: الحمد لله

محمد: شوف يا سيدي مكتوب عنك ايه في جريدة التايمز

إسماعيل: ممكن تقرأ لي وحياتك / لغاية ما أشرب فنجان الشاي اللى معايا /

محمد: ممكن جدا .. شوف يا سيدي .. ومين اللى كاتب .. ركس بيلامي أشهر ناقد

رياضي في التايمز .. اللى لو كتب عن حد ثاني يوم يدخل التاريخ فورا

إسماعيل: يعني أنا بقى دخلت التاريخ // « ضاحكا »

محمد: ودي عايزه كلام

إسماعيل: « وهو يشرب الشاي » لكن يا أبو حميد مقلتلش ركس كاتب إيه عني

محمد: بيقول ان إسماعيل الشافعي البالغ من العمر ٢٦ سنه يجب أن نطلق عليه

لقب عمر الشريف في مجال التنس فهو أيضا مصري نجم قدر يوصل على

المستوى العالمي بتأججه الباهرة وقدراته المميزة

إسماعيل: كفاية بقى أحسن أخذ مقلب في نفسي

محمد: يا كابتن دا حقك .. طب بلاش كلام ركس اللي بيشرح فيه ازاي ضرباتك الصاروخية في الإرسال عايز لها حيطه من الصلب تصدها ..

إسماعيل: امال هتقولي كلام مين ؟

محمد: كلام بوج البطل السويدي اللي انت كسبته

إسماعيل: قول ياسيدي /

محمد: لما الصحفيين الإنجليز سألوه بعد الماتش عن رأيه فيك قال بالإنجليزية طبعا .. إسماعيل لاعب أشول من الصعب الواحد يصد ضربات إرساله .. علاوة على أن أعباه على الشبكة خطيره جدا ..

إسماعيل: «ضاحكا» عندك أقوال اخرى

محمد: عندنا حفلة كبيرة هيحضرها كل المصريين والعرب اللي بيدرسوا في انجلترا عشان يحتفلوا بأبو السباع اللي رفع راسنا فوق السما

إسماعيل: يبقى يدوب استعداد

محمد: لا اطمئن الحفله بكره الساعة ثمانية

إسماعيل: احسن برضه .. اكون استريحيت بما فيه الكفاية

محمد: ودلوقت نسيبك يا بطل عشان تستريح ...

إسماعيل: متشكر جدا يا جماعة / .. مع السلامة //

«أصوات متداخلة»

روبرت: «هامسا لزميله» ماكس ايه الأخبار

ماكس: كله تمام .. ولو ان إسماعيل دلوقت ممكن يطلب مبلغ كبير

روبرت عارف أنا هاعرض عليه كام

ماكس: لا

روبرت: ١٥٠ ألف دولار في السنة.. غير جزء من إيراد كل مباراة يلعبها

ماكس: وتفتكر هايوافق؟

روبرت: بصراحة مش متأكد!!

ماكس: عشان كده لازم تدرس الموضوع قبل أي خطوة

روبرت: بس تأخيرنا أكثر من اللازم ممكن يضيع علينا الفرصة

ماكس: العقد جاهز معاك

روبرت: والشيك كمان

ماكس: يبقى تعالا معايا ... «خطوات»

«أصوات دق على الباب»

إسماعيل: من الداخل « صوت الباب يفتح»

روبرت: كابتن إسماعيل الشافعي

إسماعيل: نعم تحت امرك

روبرت: روبرت ادوار رجل اعمال امريكي .. ودا ماكس المساعد بتاعي

إسماعيل: تشرفنا

روبرت: أي كلام الواحد يقوله دلوقت عن مواهبك واسمك وشهرتك هيبقى

تحصيل حاصل بالنسبة لبطل كبير زيك

إسماعيل: أنا متشكر جدا

روبرت: $1 + 1 = 2$ المبدأ اللي كل رجال الأعمال تقريباً يمشوا عليه

إسماعيل: عظيم جدا

روبرت: عشان كده أنا جيت أعرض عليك عقد احتراف ١٥٠ ألف دولار ولمدة

سنة في امريكا .. دا طبعا بخلاف جزء من إيراد أي مباراة تلعبها غير المزايا

العادية زي تذاكر الطيران والإقامة الكاملة في الفنادق التي تختارها

إسماعيل: الحقيقة العرض ده مفاجأة بالنسبة لي .. واعتقد انه من حقي أفكر قبل ما

اعمل خطوة كبيرة زي دي

روبرت: مفيش مانع .. تحب أقابل سيادتك بكره

إسماعيل: وهو كذلك «خطوات .. صوت الباب يغلق» «فترة صمت قصيرة»

«دقات على الباب»

إسماعيل: «من الداخل» يا ترى مين تاني «الدقات» ادخل

محمد: «وهو يلهث» أنا شايف الراجل الأمريكي خارج من عندك او عني تكون

مضيت معاه

إسماعيل: طب خد نفسك الأول

محمد: يا كابتن ارجوك طمني .. دول عصابة حرامية عايزين يكسبوا من وراك

الملايين ويستغلونك

إسماعيل: اطمئن / .. أنا لسه بافكر في العرض بتاعهم /

محمد: يا كابتن أنا سمعتهم بنفسي بيتكلموا عن المكسب الكبير اللي هيعود عليهم

لو عملوا معاك عقد احتراف

إسماعيل: أشكرك جدا يا محمد على حماسك ده وخوفك على / .. بس اللي عايز

أقوله دلوقت // انهم حاولوا يخلوني احترف / لما كسبت بطولة العالم
للناشئين سنة ٦٤ وأنا رفضت //

محمد: «بدهشة» يعني انت عندك فكرة عن الموضوع ده

إسماعيل: ايوه

محمد: «بحزن» وساييني احرق في دمي وساكت

إسماعيل: أرجوك تفهمني يا محمد / .. أولا / أنا مش ممكن امضي أي عقد قبل ما
أرجع مصر وأحدد موقعي هناك / .. ثانيًا أنا رفضت العقد سنة ٦٤ وأنا
عمري وقتها ١٦ سنة رغم الإغراءات الكبيرة اللي اتعرضت على / .. دراسة
في جامعة ميتشجن / وآلاف الدولارات وكان ممكن أضعف وقتها وأقبل
العرض الكبير / بس أنا فضلت ارجع مصر وابني مستقبلي فيها // ... /
عشام كده أنا النهاردة بعد ما بقى عندي ٢٦ سنة بافكر بأسلوب تاني خالص

محمد: أنا آسف جدا يا كابتن لو كنت فهمتك غلط

إسماعيل: حصل خير / .. «ضاحكا» ايه انتو غيرتو رأيكم في الحفلة ولا ايه؟

محمد: لا أبدا بالعكس .. دي هتبقى حفلتين .. حفلة انتصارك الكبير .. وحفلة
وطنيتك العظيمة وحبك لبلدك